

FASNACHT 2020



Delifoonkabiine Adeel!

S isch druurig aber woor, s duet is wee,
um Delifoonkabiinen isch es z Basel gschee.
Die letschten Objäggt dien si demontiere und verruume,
me ka se drum bald nur no im Museum bestuune.
Mir frooge is bi däre Daatsach schlicht und gnapp,
wo mache mir denn jezt mit Frinde uf em Barfi ab!?
So het scho mänge d Orientierig verloore, sich verloffe
und nimmi z rächt gfunde, het glaubt är siggi bsoffe.

Au uf em Clara, Minster und Märtpplatz perse,
kasch kaini Delifoonkabiine mee gsee.
Gsee villicht scho, aber si sin leer und blyybe stumm.
Nur no als Riimli zum Aadängge nit emol so dumm.
Me wott dr Blatz jezt in dene Kabiine anders nutze
und duet se zum dail zu klaine Biecherkabiine usebutze.
Denn au zer Nutzig als Wärbeflechi oder Blakaatwand,
kasch die Delifoonkabiine no lang gsee, wie alt bikannt.

Grad letschti hänn mir e Touri gsee dert dinne stoo,
kurz druff aabe duet är fluechend die Kabiine wider verloo.
«Die spinne die Basler», sich z biruhige fällt ihm schwer,
«jezt hänn die doch e Delifoonkabiine aber si isch leer».
Bis oobe voll mit altem Züüg, Abfall und Drägg,
Kopfschittelnd goot dä Touri denn wider ewägg.
In de 80iger und 90iger Joor in irer volle Blieti,
Git me jezt die Delifoonkabiine wyters in Mieti.

Die mobiile Delifoon hän hit d Ooberhand ibernoo,
Fimf Gee und no mee, s isch halt aifach esoo.
Immer uf em neische Stand, s Händy mit derbyy
Nimmi diskreet innere Kabiine, das isch verbyy.
Immer verfiigbaar, s Delifoon ständig am Oor,
Wär friener unvorstellbaar gsi, s isch woor.
Denn ooni Batze im Sagg isch nit gange,
und bisch bym Signaldoon blyybe hange.

In Erinnerung wänn au mir drum die Kabiine bhalte,
dien uss unserem Waage e Dänggmool gschtalte.
Delifoonkabiine goldig, scheen und grooss,
E Monumänt fyr d Ewigkait s isch famoos.
De gsesch se drum nit nur leer in dr Stadt ummestoo,
au mit unserem Waage hesch no bitz ebbis dervoo.
aalytte kasch au bi uns nimmi, wirtsch es kabiere,
So viil hänn mir denn doch nit welle inveschiere.

E scheeni Fasnacht wintsche eich

D' Escargots-Fratze 1993

Wotsch Gönner vo de Escargots-Fratze 1993 wärde?

Denn gang doch grad schnäll uff unseri Websytte und mäld di
aa, dermit du in Zuekunft nitmee verbassisch.
Mir fraie uns uff di.

www.escargots-fratze.ch

s goldige Röppli



Hilf dr bescht Wage vo dr Fasnacht zfinde und schigg e SMS (Fr.
0.40/SMS) vom Morge- bis Ändstraich mit em **Inhalt: Waage
(Nr.)** an d Nummere 9234 und gwinn e Goldvreneli

**Mer hän d Nummere 088!! ☺ und freue uns uf dyni Stimm.
Viile Dangg.**

P.S.

D Ladäärne-Uustellig uff em Minschterplatz und d Waage- und
Reggwisyte Uustellig bi dr Kasäärne sin vom Määntig znacht bis
am Mittwuch demoorge! Deert und an de 3 Verkaufsständ
(CINS) in dr Stadt ka men au alli Zeedel und Schnitzelbängg, d
Blaggedde und dr Rädäbäng kaufe.

Am Fritig und Samschtig, 6. und 7. Meerz isch
Noochwuggswärbig vo dr 1. Lektion im Zält uff em Barfi.

D'Zeedelläsete isch am Sunntig noo dr Fasnacht 2020, am 8.
Meerz, vom Fimfi bis am Sibeni zoobe, in dr Baseldytschi Bihni
(im Lohnhof 4). Dr Ytritt isch vergäbe. D Foyer-Bar isch vom
Vieri ewägg offe.